

Ko Hono Akoako e TUÍ

Fai 'e Karee Brown

'Ū Makasini 'a e Siasí
Makatu'unga 'i ha talanoa mo'oni

“Te u fakahā kiate koe 'eku tuí 'aki 'eku ngaahi ngāue” (Sēmisi 2:18).

Ne tā mālohi mo vave 'e Kelela e pulú 'i he mala'e va'ingá. Na'á ne fakakaukau ko e taimí 'eni. Ne le'ohi 'e he ta'ahine lōloa taha mo ve'e vave taha 'i he timí 'a Kelela he taimi va'ingá kotoa. Ka kuó ne le'ohi 'eni ha taha kehe. Ko e faingamālie 'eni 'o Kelelá.

Na'á ne kalofi vave ha tokotaha va'inga 'e taha pea fokotu'u ma'u hono va'é. Na'á ne puna leva 'o fakahū. Ne puna atu e pulú he 'eá kae ta'ofi e mānava 'a Kelelá. *'Alu foki ke hū.*

Ne hū atu e fo'i pulú he loto netí. Ne tā nima mai e timi 'a Kelelá kiate ia. Hili iá na'e sio hifo 'a e Faiako ko Kāsiá ki he taimí pea ifi 'ene me'aifí. “Pea ko e ngata'anga ia 'o e ako va'ingá! Na'e lelei 'aupito e taha kotoa pē! Tau toki sio 'apongipongi. Fakapapau 'i 'okú ke mālōlō fe'unga he 'e lahi 'etau lelé.”

Ne to'e 'a Kelela mo lue atu ke tānaki 'ene 'ū me'á. Hili iá na'á ne sio atu 'oku ta'ata'alo mai 'ene Faiako ko Kāsiá.

Na'á ne pehē ange, “Ei Kelela, “Na'á ke va'inga lelei 'aupito he 'ahó ni. 'Oku ou 'ilo'i 'okú ke ngāue mālohi 'aupito 'i he ako va'ingá, pea 'oku ou polepole 'iate koe.”

“Mālō” ko Kelela ange ia mo 'ene malimalí.

Na'á ne kei malimali pē 'i he'ene lue atu ki he kā 'ene fine'eikí. 'I he'ena foki ki 'apí, na'á ne toe fakakaukau ki he'ene fakahū



TĀ FAKATĀTAI 'E ELIZABET VUKOVIĆ

faka'osí. Tautautefito ki he hū hifo 'a e fo'i pulú he netí. Ne 'ikai ke ne fu'u fakatokanga'i e lea konifelenisi ne fanongo ki ai 'ene Fine'eikí.

Ka na'e ma'u 'e ha me'a 'ene tokangá. Ne pehē 'e he tokotaha leá, “Kuo pau ke tuku hatau taimi ke ngāue 'aki 'etau tuí.” Ne ongo mai e “ngāue 'akí” 'o hangē ko ha me'a 'e fanongo ai he ako pasiketipoló. *'Efounga fēfē ha'o ngāue'i ho'o tuí?* ko 'ene fakakaukau ia. *'Okú ke lele 'i he tuí? Pe tātaa'i e tuí 'o hangē ha fo'i pulú?*

Ne tafoki 'a Kelela ki he Fine'eikí. Na'á ne fehu'i ange, “E founga fēfē ha'o ngāue'i ho'o tuí?”

Na'e malimali 'a e fine'eikí. “Oku founga fēfē ho'o fakalalakaka 'i he pasiketipoló?”

Na'e talaange 'e Kelela, “Oku ou ako va'inga.” “Oku talamai 'e he'eku faiakó e founga ke u fakalalakaka aí. Pea 'i he'eku fakahoko e fakamālohisinó, 'oku ou feinga mālohi ke fakahoko ia ke tonu.”

“Oku faingofua nai ia?”

“'Ikai!” Ne talaange 'e Kelela, 'okú ne ongo'i e ongosia hono va'é hili e lele vavé. “Kuo pau ke u ako va'inga tu'o lahi.”

Na'e kamo pē e Fine'eikí. “Oku finangalo e Tamai Hēvaní ke tau tui kiate Ia, ka kuo pau ke tau ngāue'i ia. Kuó Ne 'omi ha ngaahi founga ke tau ako va'inga mo fakalalakaka ai.”

“Hangē ko e hā?”

“Okú Ne kole mai ke tau talanoa ange kiate Ia 'i he lotú. 'Oku hangē Ia ha'atau faiakó. 'Okú Ne 'omi kiate kitautolu e folofolá. 'Oku hangē ia Ha'ane tohi va'ingá. Pea 'okú Ne ue'i e kau palōfitá ke nau fakalotolahi'i kitautolu ke tau ako fakafāmilí. 'Oku hangē hotau fāmilí—”

“Oku hangē ko 'emau timí!” Ko e tali hake ia 'a Kelelá.

“Ko ia! 'Oku ngāue 'etau timi fakafāmilí mo akoako fakataha,”



ko e Fine'eikí ange ia. “Ko e hā leva e me'a 'oku hoko 'i ho'o 'alu ki he ako va'ingá Kelela?”

Na'á ne pehē ange, “Oku ou fakalalakaka.” Na'á ne fakakaukau ki he ongo fakalata na'á ne ma'u 'i he'ene fakahū faka'osi hili ha'ane ngāue mālohi 'o lau uike he ako va'ingá.

“Oku tonu ia. 'I he taimi 'oku tau akoako aí, 'oku tau ngāue'i ai 'etau tuí. 'Oku tokoni ia ke mālohi ange 'etau fakamo'oní. Pea 'okú ne 'ai ke tau fiefia ange.”

Ne te'eki ai fakakaukau pehē 'a Kelela kau ki he tuí. Kuó ne fanongo 'oku hangē 'a e tuí ha tenga'i 'akau. Ka na'e 'ikai ke ne teitei 'ilo 'e lava ke hangē ia ko e pasiketipoló! Na'á ne fakakaukau ki he ngaahi palani 'oku fa'u 'e he'ene faiakó ki he'enua timí. *Mahalo te u lava foki 'o fa'u ha palani ako va'inga,* ko 'ene fakakaukau ia, *kae fai ia ki he tuí!* 'I he'ene a'u pē ki 'apí, na'á ne ma'u ha pepa lahi pea kamata ke ne tohi:

- Lotu—pongipongi mo e po'ulí
- Ako folofola—'aho kotoa pē
- Ma'u Lotu—Sāpate kotoa

Mahalo ne 'ikai fu'u faitatau fēfē hono faka'aonga'i e tuí mo e ako va'inga pasiketipoló. Ka ko e ako va'ingá ko e ako va'inga. Na'e ongo'i loto-māfana mo loto-fiefia 'i he'ene vakai ki he'ene palani. Na'á ne falala ki he Tamai Hēvaní mo 'ilo'i te Ne tokoni'i ia! ●

* Richard G. Scott, “Fakamu'omu'a Ho'o Ngāue'i e Tuí,” *Liahona*, Nōvema 2014, 92–95.

